



Sesida dals

Communitgà ils

Protocol nr.

15 da zercladur 2026

18 da zercladur 2026

432/2026

Dumonda da la fracziun dal Center

concernent las consequenzas da l'imposiziun da taglia individuala per ils pajataglias
(emprim sutsegnader Brunold)

Resposta da la Regenza

La Regenza beneventa l'intenziun da la dumonda, da vulair stgaffir trasparenza en vista a l'introducziun da l'imposiziun da taglia individuala (refurma). Previsiblamain vegn il Cussegl federal a metter en vigur la refurma per il 1. da schaner 2032. L'emprima giada avess la refurma pia effects per l'onn da gestiun 2033. In punct engreviant è dentant, che l'iniziativa «Gea a taglias federalas gistas er per ils pèrs maridads – Per finalmain metter ina fin a la discriminaziun da la lètg!» è anc pendent. Quella vegn sutmesssa a la votaziun dal pievel previsiblamain la fin da november 2026 u la fin da favrer 2027. Perquai n'èsi oz anc betg pussaivel da far stimaziuns fidadas davart las consequenzas finanzialas da la refurma resp. davart las grevezzas pli grondas u pli pitschnas per ils differents tips da chasadas. Las consequenzas finanzialas da la refurma resp. las grevezzas pli grondas e pli pitschnas per ils differents tips da chasadas vegnan a depender da la dumonda, co che questa refurma vegn realisada sin plaun chantunal. En quest connex sa tracti principalmain d'abolir la deducziun per conjugals cun duas pajas e la procedura da splitting parzial, da controllar l'autezza e la repartiziun da las differentas deducziuns per uffants e deducziuns socialas, d'examinar la pussaivladad d'introducir novas deducziuns e sche necessari d'adattar la tariffa da taglia. En il rom da la realisaziun da l'imposiziun da taglia individuala vegn l'Administraziun da taglia a preschentar detagliadamain las consequenzas finanzialas resp. las grevezzas pli grondas u pli pitschnas per ils differents tips da chasadas. Las evaluaziuns vegnan preschentadas e commentadas en il rapport explicativ da la consultaziun e pli tard en la missiva al Cussegl grond.

Tar la dumonda 1: Grevezzas pli grondas vegnan a resultar cunzunt per quels pèrs maridads, nua ch'ìls conjugals han entradas da fitg differenta autezza. Er per pajataglias cun uffants vegni a dar ina grevezza pli gronda. Pervia da la refurma pon las deducziuns per uffants avoir – tant tar la taglia federala directa sco er tar las taglias chantunalas e communalas – effects fiscals differentes pervia da la progressiun fiscala en cas d'entradas fitg differentas. E sche las entradas èn fitg bassas u sch'in genitur n'ha naginas entradas, èsi schizunt pussaivel, ch'i na resulta nagin effect resp. nagina distgargia fiscala. Grevezzas pli grondas èn la finala er da spetgar per partenaris da concubinat e per personas che vivan sulettas cun uffants. L'onn fiscal 2023 vivevan circa 40 000 conjugals en il chantun Grischun. Circa 25 000 pajataglias (conjugals sco er personas nunmaridadas u personas che vivan sulettas) fan valair ina deducziun fiscala per uffants. Questa gruppa dastgass esser pertutgada il pli fitg da la refurma.

Tar la dumonda 2: Las grevezzas pli grondas, che vegnan chaschunadas pervia da la refurma cun surpigliar la soluziun federala, vegnan eruidas en il rom dal project legislativ ch'è da prender per mauns per realisar l'imposiziun da taglia individuala.



En num da la Regenza

Il president:

Martin Bühler

Il chancelier:

Daniel Spadin